

# Las Terras subditas Vuclina, Buorm e Clavenna

## Part 2: Scumbigls, abus e fin dal domini

### Murdraretsch en Vuclina (1620)

Mazzament da radund 600 protestants en Vuclina (ca. 90 % indigens, il rest uffiziants reformads grischuns e.a.), commess dals catolics da la Vuclina tranter ils 19 ed ils 23 da fanadur 1620, cun sustegn da las truppas spagnolas. Numnà fin avant pauc temp en l'istoriografia tenor il talian Sacro Macello ed examinà a moda memia unilateralà sut l'aspect religius-confessiunal. La revendicaziun da la libertad per las communitads vuclinaisas e las sentenzias rigurusas pronunziadas (uffizialmain) il 1618 da la dretgira nauscha da Tusaun cunter Nicolò Rusca per avair instigà ils subdits e partisans spagnols a l'insubordinaziun envers las autoritads grischunas, han provocà en Vuclina ina conspiraziun ch'aveva en mira da separar la Terra subdita da las Trais Lias e d'extirpar ils protestants en Vuclina. Il chau da la conspiraziun, la rait da la quala tanscheva fin a Madrid, Roma e Paris, era Giacomo Robustelli da Grossotto (Vuclina), il parent da Rudolf von Planta animà da sentiments da vendetga persunals. L'assassinat ha cumenzà la notg dals 18 als 19 da fanadur 1620 a Tiraun ed ha cuntinuà alura a Tegl, Sunder e vinavant da la val oragiu. Ad ina part dals protestants èsi reussi da fugir a l'exteriur; tranter ils mazzacrads eran il vicari Anton von Salis-Soglio ed ils podestats Andreas Enderlin (Tegl) e Hans de Capol (Tiraun). Ils conspirators avevan cuntanschi qua tras lur finamira confessiunala: l'extirpaziun dal protestantissem en Vuclina. Lur finamira politica era d'abolir il domini dal Grischun ch'è dentant vegnì restabilì il 1639 (Capitulats da Milaun).

Martin Bundi

### Nicolò Rusca

\* 20 d'avrigl 1563 a Bedano/TI, † 4 da settember 1618 a Tusaun, catolic, da Bedano. Figl da Giovanni Antonio, notar, e da Daria nata Quadrio. Studi da teologia al Collegium Helveticum a Milaun, ordinà il 1587 e, sventer studi a Pavia, dr. teol. 1591. Archiprer da Sunder 1590, sco tal incumbensà da l'investg da Com Feliciano Ninguarda d'exequir la Refurma tridentina e da cumbatter la Scola nazionala reformada, planisada a Sunder. Il 1608/09 è el vegnì arrestà e sutmess ad in process da plirs mais, dal qual el è sa salvà tras fugia. Il 1618 ha la partida veneziana reformada (Gieri Genatsch, Steffan Gabriel, Caspar Alexius e.a.) tegnì a Tusaun ina dretgira nauscha cunter Rusca ed ils partisans da la Spagna (Johann Baptist Prevost, Rudolf e Pompejus von Planta, l'investg Johann Flugi e.a.) e condemnà Rusca per intolanza confessiunala (Scola nazionala) e tradiment da la patria. Rusca è mort en consequenza da la tortura ed è vegnì sepulì sut la furtga, ses possess è vegnì sequestrà. Il 1619 ha l'avat da Faveras, Michael Sauer, procurà ch'el obtengia in funeral tenor las normas ecclesiasticas. Ina tavla fixada en la cripta da la baselgia claustrala da Faveras regorda a quest'aziun. Il 2013 è vegnì terminà il process da beatificaziun.

Max Hilfiker

### Giacomo Robustelli

\* enturn il 1583 a Grosotto (Vuclina), † enturn il 1646 a Domaso (al Lai da Com). Descendent d'ina famiglia da noblezza ministeriala da la Vuclina. Ritg possessur da terren e fittader da terren feudal. Studi da dretg e litteratura ad universitads talianas. Servetsch militar per il duca da Savoia ch'ha fatg el chavalièr. Partisan da la Spagna-Austria en Vuclina, cumbattant per la separaziun da la Vuclina dal Grischun. Il 1618 ha la dretgira nauscha da Tusaun condemnà Robustelli ad in aut chasti ed a l'expulsiun. Il 1620 ha Robustelli manà ils rebels ch'han assassinà var 600 protestants (Murdraretsch en Vuclina). Dal 1621-24 e dal 1627-30 è el stà guvernatur da



Il 1797 è la Vuclina sa declarada libra da las Trais Lias.

la Vuclina, occupada da truppas papalas e spagnolas. Il 1630 è el fugì en l'exil a Domaso, danunder ch'el ha empruvà (senza success) d'impedir la pasch ed il Capitulat da Milaun dal 1639 tranter la Spagna e las Trais Lias.

Martin Bundi

### Cumpra d'uffizis

En la Republica da las Trais Lias eran ils uffizis caricas d'onur, il salari surpassava strusch las expensas. I regiva però l'opiniun generala ch'els valian insatge (onur) e duajan perquai era custar insatge. L'occupaziun dals uffizis en Vuclina è stada ina da las pli grondas deblezas dal guvern grischun. Quests uffizis vegnivan pratitgads, vul dir martgadads sco rauba. Dals daners da puniziun, da taxas per patentas ed auter culava mo la terza part en la cassa dal pajais (Camera dominicale, tudestg Kammergeld), il rest svaniva en las gioglioffas dals uffiziants. Quels offerivan per exempel als sentenziads da midar painas corporalas en uschenumnadas liberaziuns (multas) e faschevan qua tras cular ils daners en lur bursa. L'exceptiun è daventada la regla ed ha corumpì il dretg ed il sentiment da justia. Era plants civils vegnivan supprimid cun daners, en cas criminals vegnivan scrites brevs da liberaziun. A la fin da lur uffizi stuevan ils uffiziants grischuns avair respect mo da la Sindicultura e da la Dieta federala ch'eran mintgatant incalculablas. Il Kesselbrief dal 1570 scumandava generalmain il pratitgar uffizis e sentenzias e pretendeva che tut ils uffiziants engirian, sut paina da perder bain ed onur, ch'els hajan acquistà lur uffizi senza praticas. Malgrà repetidas modificaziuns n'ha questa lescha mai funcziunà, cun exceptiun d'inginas dretgiras nauschas contestadas dal punct da la vista legal.

En il 16avel tschientaner vegnivan ils uffiziants per las Terras subditas elegids da la Dieta federala; dapi la Refurma dal pajais dal 1603 vegnivan els repartids en roda tranter las dretgiras autas. La cumpra d'uffizis da delegads per la Dieta era medemamain scumandada e mintga dretgira auta ha stuì instituir ina dretgira penala en chaussa. La Refurma dal pajais duava dismetter definitivamain il pratitgar uffizis; ella ha dentant stimulà pir da dretg il commerzi ch'è suletmain sa spustà da la Dieta federala als cumins. Ils uffizis vegnivan martgadads per part gia 10-20 onns ordavant tranter persunas singulas u societads d'uffizis e francads cun ina brev da martgà.

Per ils uffizis en Vuclina e per la landfocia da Maiavilla devi veritablas glistas da pretschs. La mesadad vegniva pajada cun la cumpra da l'uffizi, il rest cun l'entrada en uffizi. Il retgav vegniva per ordinari repartì tranter ils votants dal cumin u consegnà a la cassa dal cumin respectivamain a quella da la vischnanca. Il cumprader pudeva vender vinavant sias vuschs ad agen profit. Las dietas han adina puspè empruvà (per exempel il 1644, il 1649 ed il 1668) d'abolir la vendita d'uffizis per la Vuclina u almain da franar l'augment fraudulant dals pretschs. Las stirpas aristocraticas bainstantas eran, tranter auter per motifs da sistem, talmain dominantas che la Dieta extraordinaria dal 1767 a Tusaun aveva limità il dumber dals uffiziants aristocratici. Fin a la dretgira nauscha dal 1794 n'è sa midà praticamain nagut. Sper il contractar dals candidats cun lur cumins e vischnancas existiva la pratica da far il mulissier e dad ir da chasa a chasa a comprar vuschs («dar baz», vul dir spender daners). Questa pratica era usitada per la cumpra da l'uffizi da mastral ed è per exempel attestada per il cumin da la Cadi dal 1685. Sut pressiun da la Regenza grischuna han ins cumenzà en il 19avel tschientaner a pajar il debit dal cumin empè da dar baz. Anc fin viaden il 1840 pajava il mastral pli u main en tut il Grischun per l'onur. Ils 4 da december 1846 han ins relaschà ina lescha chantunala che scumandava pajaments, taxas, urtas e regals per uffizis. La giurisdicziun grischuna aveva patì bler main dal martgadar uffizis che quella da las Terras subditas, perquai ch'els uffiziants stuevan prender qua resguard sin il suveran sco signur sur uffizis ed onurs.

Adolf Collenberg

### Diego Guicciardi

\* 1756 a Ligiaun, † 1837, catolic, da Ponte (Vuclina) e Ligiaun. Oriund d'ina famiglia nobla da la Vuclina. Il cont Guicciardi è stà dal 1785-87 chancliel da la Vuclina, da quel temp territori sutmess al Grischun, dal 1786-96 delegà per l'appaschentaziun da las differenzas cun las Trais Lias. Il 1797 ha el sustegnì la fusiun da la Vuclina cun la Republica cisalpina, en la quala el ha occupà, sco pli tard en il reginavel d'Italia, uffizis ministerials. Represchentant dal Departament da l'Adda al Congress da Vienna 1815. Aderent da l'Austria ed activist principal en il moviment per la refurma politica ed independenza da la Vuclina.

Jürg Simonett

### Confisca

Ils 20 d'october 1797 ha Napoleun Bonaparte decretà l'incorporaziun da las anteriuras Terras subditas da las Trais Lias en la Republica cisalpina. Ils 28 d'october 1797 ha il comité revoluziunar (Comitato Prowisorio permanente di Vigilanza e Corrispondenza) proclamà la confiscaziun da tut las valurs da facultad da Grischuns en Vuclina, a Buorm ed a Clavenna. Pertutgads eran members da passa 100 famiglias e da nov corporaziuns, tranter quellas vischnancas, plaivs e claustras. Grondas perditas han subi tranter auter ils Salis e la claustra da Mustér. Ils donns vegnan stimads a ca. 3,6 miu. rentschs. Las emprimas stentas per ina revocaziun da la Confisca, che steva en cuntradicziun cun il dretg dals pievels (internaziunal), u almain per ina indemnizaziun dals pertutgads, dateschan gia dal 1797. Ma l'Austria, successiva legala da la Republica cisalpina, ha reconuschì principialmain il dretg d'indemnizaziun dals Grischuns pir il 1815 al Congress da Vienna. L'uschenumnà Confiscacomité, constituì il 1816 da set commembers, tranter ils quals temporarment tschintg exponentes da la famiglia von Salis, ha cuntanschi il 1834, suenter lungas tractativas cun la diplomazia austriaca, la restituziun dad 1 642 372 florins (che correspundan a ca. 45% dals 3,6 miu. rentschs). La repartiziun da quests daners als donnegiads dal 1797 ha durà fin il 1862. Las perditas tras la Confisca han indebli la basa economica da numerusas famiglias che n'en per part betg pli sa revegnidas.

Silvio Margadant

### Congress da Vienna

Reuniun dals monarcs e politichers europeics a Vienna dal settember/october 1814 fin il zercladur 1815, cun la mira da reorganisar l'Europa suenter la cupitga da Napoleun I. La reconquista da la Vuclina e dals contadis da Clavenna e da Buorm tras ils reacziunaris grischuns enturn il cont Johann von Salis è stada in'interpresa invana suenter il naufragi da la campagna a Clavenna l'entschatta da matg 1814. Ina eventuala restituziun da las Terras subditas era pussaivla mo pli sin via diplomatica. La nova Constituziun chantunala, acceptada ils 9 da settember 1814, aveva sclerì da princip la dumonda dals cunfins dal chantun Grischun. Ma tge far cun las anteriuras Terras subditas: annectar quellas a la Svizra en furma d'ina quarta Lia?, d'in chantun u d'in mez chantun?, vender ellas utrà? E tge far cun la Confisca? En

cas d'ina annexiun sin basa da l'egualitad da dretgs avess l'Italianitad obtegnì in surpais economic e linguistic e las paritads confessiunalas fissan vegnidas midadas en favur dals catolics (maioritad). Questas soluziuns n'eràn betg attractivas per la maioritad tudestga e reformada dominanta en la Lia da la Chadé e la Lia da las Diesch Dretgiras. Il prim da settember 1814 ha la cumissiun chantunala proponì a la Dieta federala d'incorporar la Vuclina cun ses 70 000 abitants sco nov chantun a la Confederaziun svizra e d'attribuir ils contadis da Clavenna (13 000 abitants) e da Buorm (5000 abitants) al Grischun. Questa proposta (uffiziala) è vegnida cumbattida dal landamma da la Confederaziun Hans von Reinhard. El era cunter la fundaziun d'ulteriurs chantuns ed ha refusà la proposta davant la Dieta e la cumissiun diplomatica a Vienna. L'idea da fundar dus mezs chantuns (Grischun, Vuclina) è vegnida abandonada gia ils 2 da settember 1814.

A Vienna operavan, ultra da la delegaziun confederala (Hans von Reinhard, Jean de Montenach e Johann Heinrich Wieland), var 20 ulteriuras delegaziuns da la Confederaziun ed almain duas dal Grischun: ina da quellas (Vincenz, Daniel e Johann von Salis) aveva da s'occupar da la recumpensaziun da la Confisca, l'autra (Christoph de Toggenburg e Christoph von Albertini), delegada dal Grischun a Vienna a la sava dal 1814/15, aveva l'incumbensa da cuntanscher la restituziun da las Terras subditas a la Svizra e d'impedir a medem temp che Vienna disponia davant lur constituziun. En cas d'ina tala disposiziun externa duavan ils contadis da Buorm e da Clavenna vegnir incorporads al Grischun. La fundaziun d'in chantun Vuclina na vegniva betg en dumonda; ins avess tut il pli acceptà in'administraziun independenta dal Grischun. L'Austria ha profità da la disfidanza (giustifitgada) visavi Reinhard e da la discordanza da las delegaziuns svizas areguard il status da la Vuclina ed ils emissaris vuclinais, il cont Diego Guicciardi e Girolamo Stampa, han exprimi en num da la Vuclina e dals contadis il giavisch unanìm da restar annectà a la Lombardia. Ils 18 da mars 1815 ha la cumissiun dal congress per la Svizra decis d'incorporar la Vuclina, Buorm e Clavenna a l'Austria che duava ceder da sia vart al Grischun il signuradi da Razén e tut ils anteriurs dretgs suverans (a Tarasp e Razén). Metternich ha empermess en pli da recumpensar la Confisca. Ils 15 da zercladur 1815 han ins signà l'acta finala. Ils Grischuns l'han approvà, senza renunziar formalmain a las Terras subditas. L'emprova dal 1866 da reacquistar la Vuclina sin via diplomatica n'è betg reussida. Tenor Alfred Rufer è stada la renunzia a la Vuclina «il pretsch ch'il Grischun e la Svizra han stuì pajar per l'arrundaziun da Geneva». La plipart dals Confederads han magunà spert questa perdita che n'era, a lur avis, betg la meglra, ma n'era betg la mendra soluziun per il Grischun.

Il 1819 èn ils anteriurs dretgs feudals austriacs en il Grischun vegnids restituid formalmain al chantun Grischun ed ils dretgs suverans seculars da l'uestg da Cuir e dal possess diocesan en il Tirol (Fürstenburg) èn puspè passads a l'Austria.

Adolf Collenberg

## Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.